

同安縣志

卷三十

外紀 旧序
旧志小引

安縣志卷之三十

外紀

聖賢立言著於經傳百家諸子各自成書外此
仿拾遺之體爲外紀焉邑之軼事父老所傳聞
稗官所紀載不一矣雖世遠年湮畱什一於千
百錄以備覽殆亦鑒古之所資乎志外紀

唐宣宗居邸時嘗遁跡於夕陽山與黃蘗斷際和尚
觀瀑蘗吟云穿巖越壑不辭勞到底方知出處高
宣宗續云溪澗豈能畱得住終歸大海作波濤山

中有真寂寺距寺里許有國師巖巖前有石橫臥狀如鼓叩之作鼓聲石洞二竅相傳宣宗時出米供食宣宗去遂不復有山澗有橋鐫浴龍橋三字相傳宣宗浴此

府志參
閩書

宣宗長慶中封光王唐書第稱韜晦未嘗遁跡而唐尉遲偓作中朝故事宣宗憲皇少子皇昆卽穆宗也穆宗敬宗之後文宗武宗相次卽位宣皇皆叔也武宗初登極皆深忌焉一日會鞠於禁苑閒武宗召上遙觀瞬目於中官仇士良躍馬向前曰適

有旨王可下馬士良命中官輿出軍中奏曰落馬
已不救矣尋請爲僧行遊江表閒會昌末中人請
還京遂卽位則其事固有據者

福建
通志

陳黯字希儒潁川人十歲能詩舉進士不第避黃巢

亂隱終南山後徙同安之嘉禾嶼薛嶺讀書終身

號曰場老時人稱其所居山爲場老山所爲文有

辨謀等篇復有書三卷約大易虛一數四十九篇

名曰稗正朱子簿邑時得書於其家而爲之序

閩大

記參八
閩通志

黯字希儒父贇通經及第娶江夏黃夫人素賢惟生

黯無昆仲姊妹十歲能詩十三袖詩一通謁清源

牧其首篇咏河陽花時面痘新愈牧戲之曰藻才

而花貌胡不咏歌黯應聲曰玳瑁應難比斑犀定

不加天嫌未端正滿面與裝花由是聲名大振於

州里

唐黃滔陳穎川集序

按據此則黯固已生長在閩明人皆言其初隱終南後徙嘉禾未

知何據

唐史藝文志云黯南安人有集三卷通志略云三十

卷今按文公序則其爲三卷是矣但序云唐陳昌

晦撰而志謂黯字希儒昌晦或黯別號歟府志

陳黯凡十八舉不第所著有綺莊集其詩皆不凡而

樂府格調尤高同郡王肱蕭樞同邑林顥漳浦赫

連韶福州陳懿陳發詹雄皆一時秀士黯名價相

埒而並不遇世嘆其屈

林霍詩話

薛沙長溪人令之裔孫爲龍溪尉因卜居于同安嘉

禾嶼人稱所居嶺爲薛嶺嶺之南陳黯宅在焉時

號南陳北薛五世至之偓任司農少卿宋元祐中

裔孫穎士舉貢士著作郎按閩書薛嶺以令之得

名令之登神龍二年進士黜乃會昌時人相去百
二三十年不應有南陳北薛之目且令之本傳亦
不載其遷寓同安覽勝志作薛沙較確今從之覽勝
志參府志

令之字珍君福安人神龍二年進士閩人以詩賦登
第自令之始開元中累遷左補闕兼太子侍讀與
賀知章並侍東宮時李林甫不愜於太子宫僚冷
落令之欲諷明皇題壁云朝旭上團團照見先生
監監中可所育肯藉長欄杆明皇覽不悅援筆題

曰啄木嘴距長鳳凰羽毛短若嫌松桂寒任逐桑榆煖令之遂謝病徒步歸明皇聞其貧令有司資以歲賦令之量口受賜及肅宗卽位以舊德召而令之已逝矣因勅名其鄉曰廉鄉水曰廉水有明月先生集行於世

葉晴峯詩話

唐謝脩青礁人清心藻思廻拔流俗當廣明西幸恥於事逆晦迹窮岫與其弟修築宇著書悠然自適比光啓回鑾出登上第後人名所居爲文圃而山之名因之迨五代分崩主簿洪文用不爲時屈與

族人澤偕隱於此所著書名文圃集宋熙寧間石
蕢字華甫以世胄薄遊論新法不合歸結廬於龍
池巖下所著書亦以文圃名集數百年間後先相
望清風昭世楊志作三賢堂祀之西蜀何致一爲
之志宋人石賡有云文圃山層巒疊嶂中松蘿幽
邃洞谷天成夫其跨二郡之交居然勝地故應有
高人焉謝旣鴻漸洪亦豹隱華甫繼作重結鷗盟
殆足駕中區光前籍矣

海澄縣志

盧鄒光啓中侍御史科第未詳

舊志

朱文公中縣請本縣進士徐應中王賓以充學廣文
陳珪徽宗朝爲提舉徽州使謝圖南嘉熙閒爲瓊
州安撫使洪十九郎紹興閒知南安縣洪敦仁爲
館閣校勘查王賓係宣和元年特奏名晉江人

舊志

省志叢談云沈彬同安人嘗指葬穴於長泰縣恭順
里曷山之旁以示家人後開壙有漆燈一盞以石
爲臺壙頭有銅牌篆文云佳城今日開雖開不葬
埋漆燈猶未滅留待沈彬來後有狀元沈晦者卽
其裔也按彬筠州人瑞州記載彬墓在府城西北

彬棄官南唐手植一樹以誌葬地云云則省志誤矣然廣輿又載之於鎮江丹陽沈山下殊不可解也攷雅言雜載云彬字子美一作子文天才狂逸好神仙之事三舉不第遂放遊湖湘閒二十餘年後受李氏僞命官至禮部侍郎致仕歸高安此筠之所以志彬墓也又江南野錄沈彬高安人早有詩名先王鎮金陵知其欲代楊氏獻詩云祇須手筆安排定不怕山河整頓難先王覽而喜之臨終云云此丹陽之所以亦志彬墓也乎要之彬唐末高士

豪於詩沈姓樂祖之真者不必言卽冒濫者亦必
指一填以實之孰僞孰真俱不可知然彬生長於
筠而宦遊於吳二者必居其一若甌閩之間則彬
未嘗托跡而漳泉之間乃有子孫墳墓豈可信哉
彬佳句甚多湘江行云數家漁網疎雲外一岸殘
陽細雨中尤爲當世所賞

葉晴峯
詩話

五代謝圖南以才兼文武舉歷官封開國男食邑本

縣

福建
通志

翰林蘇公紳嘗題潤州金山寺云僧依玉鑑光中住

人踏金鰲背上行時公方舉大科識者以人踏金鰲背上行乃榮入玉堂之兆已而果然公位止於

內相豈亦詩之讖耶

青箱雜記

蘇子容愛元白劉賓輩詩如汝洛唱和皆往往成誦

苦不愛太白輩詩曾誦汝洛集九日送人云清秋

方落帽子夏正離羣以爲假對工大無及此聯又

舉劉夢得送李文饒再鎮浙西詩以爲最著題

詩話

總

魏收有庸峭難爲之語人多不知其義文潞公以問

蘇子容子容曰向聞之宋元憲云事見本經蓋梁
上小柱取其有曲折峻峭之勢耳言人之儀矩可
喜者曰庸峭收乃用此事作詩爲謝曰高宴初陪
聽鼓鼙清談仍許奏揮犀自知伯起難庸峭不及
淳于善滑稽舞奏未終花十八酒行先困玉東西
荷公德度容狂簡故敢忘懷夫町畦

宋稽
類抄

劉丞相莘老殿試時蘇丞相子容爲詳定官子容後
尹南京莘老復僉判在幕中相與歡甚元祐初莘
老自中書人爲左丞子容猶爲翰林學士承旨及

莘老遷黃門子容始爲左丞莘老宿東省嘗以詩
寄子容云膺門早歲預登龍僉幕中閒託下風敢
謂彈冠煩貢禹每思移疾避胡公蓋記前事而子
容答之有末路自驚黃髮老平時曾試黑頭公之
句當時以爲盛事又三年莘老旣相而罷子容始
踐其任云

石坡詩話

元豐中進士唱名於集英殿有暨陶者主司呼以去
聲三呼不應蘇頌進曰當以入聲呼之果出應上
問何以知之頌曰三國時吳有暨艷造營府之論

恐其後問陶鄉里廼崇安人上喜曰果吳人也初
頌從事南京杜正獻公尙亡恙嘗謂頌道其平生
出處施設本末且曰子異日所至亦如老夫其後
頌更踐內外以至得謝爵齒名德略相似焉然則
杜公可謂知人已

曾肇蘇司
空墓誌

崔唐臣與蘇子容呂晉叔同學蘇呂旣登第唐臣遂
隱於江湖不知所之及蘇呂同入史館乘馬偕出
忽見唐臣艤舟汴河亟往謁之問所從來唐臣曰
吾貿販江湖因買此舟雖梗泛蓬飄差愈應舉覓

官時耳兩人邀之不可但叩其官居坊曲所在明日兩公自局中還各覩唐臣畱刺末有細書云集賢仙客問生涯買得漁舟玩歲華案有黃庭尊有酒少風波處便爲家再訪之則已行矣蹤跡遂絕

葉晴峯

詩話

蘇緘子子元爲閤門祗候召對上謂曰邕州賴卿父守禦尚如欽廉卽破則寇乘勝奔突桂象皆不可保矣昔張巡許遠以睢陽蔽江淮較之卿父未爲遠過改授殿中丞通判邕州子孫同死者皆褒贈